

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- चुनां आयोग नै जम्मू कश्मीर विधानसभ लेई चुनाएं दी घोषणा करी दित्ती ऐ। मदान त्रऊं गेडें च 18, 25 सितम्बर ते पैहली अक्टूबर तरीक गी। वोटें दी गिनतरी 4 अक्टूबर गी होग। आदर्श अचार संहिता लागू।
- पैहले गेड़ तैहत 18 सितम्बर गी वोट पोआए जांगन, अधिसूचना 20 अगस्त गी जारी कीती जाग। बक्ख-बक्ख सियासी पार्टिएं चुनाएं दे ऐलान दा सुआगत कीता ऐ।
- जम्मू कश्मीर पुलसै जम्मू प्रांतै च आतंकी हमले च आई दी तेजी गी दिक्खदे होई आतंकवाद रोधी 19 विशेष इकाइयां कायम कीतियां न।
- श्री अमरनाथें गी यात्रा अपने समापन आली बक्खी बधै करदी ऐ। छड़ी मुबारक रिवायती रस्तेया पवित्र गुफा बक्खी जा'रदी ऐ।
- इस म्हीने दी 28 तरीक गी शुरू होआ'रदिएं पैरा ओलंपिक्स खेड्डें च भारत दा 84 खडारिएं दा अजें तोड़ी दा सब्बने शा बड्डा दल हिस्सा लैग।

<><><><><><>

JK Election

जम्मू कश्मीर च विधानसभा चुनाएं दी घोषणा करी दित्ती गेइ ऐ। जम्मू कश्मीर च मतदान 18 सितम्बर, 25 सितम्बर ते पैहली अक्टूबर गी कुल त्रऊं गेडें च करोआया जाग। जम्मू कश्मीर दी 90एं विधान सभा सीटें लेई पाए जाने आले वोटें दी गिनतरी 4 अक्टूबर गी होग ते उस्से रोज चुनां नतीजे बी आई जाने दी मेद ऐ। जम्मू कश्मीर ते हरियाणा विधानसभा चुनाएं दी घोषणा भारत दे मुख् चुनां आयुक्त राजीव कुमार होरें कल नमीं दिलली च इक प्रेस कांफ्रेंस दरान कीती। चुनाएं दी घोषणा दे कन्नै गै आदर्श अचार संहिता बी लागू होइ गेई ऐ। राजीव कुमार होरें आखेआ जे आयोग समावेशी ते हर कुसै दी पुज्ज जकीनी बनांदे होई चुनां कराने लेई वचनबद्ध ऐ।

मुख्य चुनां आयुक्त होरें दस्सेआ जे जम्मू कश्मीर दिएं 90 विधानसभा सीटें लेई मेदवारें दे भविक्ख दा फ़ैसला करने लेई योग्य मतदाताएं दी गिनतरी 87 लक्ख कोला मती ऐ। उनें दस्सेआ जे जम्मू कश्मीर च ग्रामीण ते शैहरी इलाकें गी रलाइयै कुल 11 ज्हार 800 मतदान केन्द्र बनाए जांगन। नामांकन दाखल करने दी प्रक्रिया 20 अगस्त कोला शुरू होआ'रदी ऐ। पैहले गेड़ तैहत 24 सीटें लेई मतदान 18 सितम्बर गी पुलवामा, अनंतनाग, शोपिया, कुलगाम, रामबन, किश्तवाड़ ते डोडा जिले च करोआया जाग, जिसलै जे दुए गेड़ तैहत 26 सीटें लेई 25 सितम्बर गी गांदरबल, श्रीनगर, बडगाम, पुंछ, रियासी ते राजौरी जिले च ते खीरी गेड़ तैहत पैहली अक्टूबर गी 40 सीटें लेई मतदान बांडीपोरा, कुपवाड़ा, बारामुला, उधमपुर, जम्मू, साबां ते कटुआ जिले च होग।

<><><><><><><>

Political Reaction

नैशनल कांफ्रेंस, बीजेपी, पीडीपी, कांग्रेस, अपनी पार्टी, डैमोक्रेटिक प्रोग्रेसिव आजाद पार्टी ते सीपीआई(एम) सनें सारे राजनीतिक दलें ते आम जनता नै जम्मू कश्मीर च विधानसभा चुनाएं दी घोशणा दा सुआगत कीता ऐ। केन्द्री मंत्री अमित शाह होरें जम्मू कश्मीर च विधानसभा उचुनां दे ऐलान दा सुआगत कीता ऐ। इक सोशल मीडिया पोस्ट च शाह होरें आखेआ जे जम्मू कश्मीर च सरकार दे शांति, विकास ते मजबूत प्रजातंत्र दा नमां माहौल बनाए दा ऐ। एहदे आस्तै सरकार पिछले 10एं ब'रें दा कम्म करा'रदी ऐ। उनें आखेआ जे विधानसभा चुनाएं कन्नै जम्मू कश्मीर च लोकतंत्र दी जड़ां मजबूत होंगन ते विकास दा नमां दौर शुरू होग। उनें जम्मू कश्मीर दे लोकें गी चुनाएं च बधियै चढ़ियै हिस्सा लैने दी अपील कीती ऐ। जम्मू कश्मीर कांग्रेस पार्टी दे कार्यकारी प्रधान, नैशनल कांफ्रेंस दे प्रधान डॉ. फारूक अब्दुल्ला, पीडीपी नेता इल्लिजा मुफती, सीपीआई(एम) नेता युसूफ तारीगामी, डीपीएपी दे अध्यक्ष गुनाम नबी आजाद होरें जम्मू कश्मीर च चुनाएं दी घोषणा पर खुशी जाहर कीती ऐ। आम लोकें एहदे पर अपनी प्रतिक्रिया दिंदे होइ आखेआ.....

<><><><><><><>

Congress Chief

जम्मू कश्मीर लेई विधानसभा चुनाएं दी घोषणा होंदे गै कांग्रेस नै वकार रसूल वाणी हुंदी थाहर पार्टी दे वरिष्ठ लीडर तारिक हमीद कर्रा होरें गी जम्मू कश्मीर प्रदेश कांग्रेस कमेटी दी नमां अध्यक्ष बनाया ऐ। जारी इक ब्यानै च पार्टी महा सचिव के.सी.वेणुगोपाल होरें दस्सेआ जे कांग्रेस दे वरिष्ठ लीडर तारा चंद ते रमण भल्ला होरें गी जम्मू कश्मीर प्रदेश कांग्रेस कमेटी दा कार्यकारी अध्यक्ष बनाया गेआ ऐ।

<><><><><><><>

NC Election

साबका मुख्यमंत्री ते नैशनल कांफ्रेंस दे प्रमुख डॉ. फारुक अब्दुल्ला होरें मेद प्रगट कती ऐ जे भारतीय चुनां आयोग जम्मू कश्मीर च सब्बने सियासी पार्टिएं गी इक्कै जनेआ मौका उपलब्ध कराग। कल श्रीनगर च मीडिया कन्नै गल्ल करदे होई उनें आखेआ जे ओह नेई चांहदे जे कुसै इक पार्टी गी विशेष तरजीह थ्होंदी रवै ते बाकी दल अनदिक्खी दा शकार होइयै अपना चुनां प्रचार बी ढंगै सिर नेई करी सकन। डॉ. अब्दुल्ला होरें अगगे आखेआ जे प्रशासन ते सुरक्षा विभागें च बड्डे पैमाने पर तबादले ते बदलाव होंदे दिक्खियै इआं बझोंदा ऐ जे प्रशासन गी चुनां दी घोषणा बारे पैहले गै पता हा। उनें आखेआ जे चुनां आयोग गै एहदा संज्ञान लेंदे होई प्रशासन गी इनें तबादलें पिच्छे दी मंशा बारे जरूर पुच्छना लोडचदा।

<><><><><><>

Tranfers

मुख्य चुनां आयुक्त राजीव कुमार हुंदे आस्सेआ जम्मू कश्मीर च विधानसभा चुनां दे ऐलान आले रोज गै जम्मू कश्मीर प्रशासन नै 146 अधिकारिएं दे तबादले दा हुक्म जारी कीता ऐ जिंदे च 8 आईएस, 2 आईपीएस ते 132 जेकेएस अधिकारी शामिल न।

<><><><><><>

LG-Inaguration

उपराज्यपाल मनोज सिन्हा होरें कल बडगाम जिले च 40 करोड़ रपे कोला मती लागत दिएं बक्ख-बक्ख विकास परियोजनाएं चा किश दा नीह पत्थर रखेआ ते किश दा उदघाटन कीता। एहदे इलावा मनोज सिन्हा होरें जम्मू नगर निगम, जम्मू स्मार्ट सिटी लिमिटेड, श्रीनगर नगर निगम, श्रीनगर स्मार्ट सिटी लिमिटेड, शैहरी मकामी निकाए सरबंधी निदेशालय ते जम्मू कश्मीर झील संरक्षण ते प्रबंधन प्राधिकरण दिएं 40 स्कीमें ते कम्में दा ई-सरिस्ते राएं उदघाटन बी कीता। उपराज्यपाल होरें शैहरी मकामी निकाएं श्रीनगर ते जम्मू दिएं 26 करोड़ 25 लक्ख रपे दी लागत आलिएं 6 परियोजनाएं दा नीह पत्थर बी रखेआ। मनोज सिन्हा होरें शेखपुरा च बडगाम जिले दे पंचैती राज इदारें दे मिंबरें दे ठैहरने लेई सुविधा दा बी उदघाटन कीता जेहदे पर 6 करोड़ 41 लक्ख रपे दी लागत आई ऐ। इस पैहल दा मकसद पंचैती राज इदारें दी भलेयां जमीनी सतह पर मजबूती गी जकीनी बनांदे होई उंदी सुरक्षत ते सुविधाजनक ठैहरने दी बवस्था करना ऐ।

<><><><><><>

JKP Anti Terror

जम्मू कश्मीर पुलस नै जम्मू खित्ते दी 8 जिलें च आतंकवाद दे खात्मे लेई विशेष 19 इकाइयां स्थापत कीतियां न। एह गैह जम्मू दे शांत क्षेत्र च बधदे आतंकवादी हमलें गी दिक्खदे होई पुट्टी गई ऐ। इक वरिष्ठ अधिकारी मूजब इनें इकाइएं गी अगुवाई डिप्टी सुप्रीटेंडेंट ऑफ पुलस आस्सेआ कीती जाग। उनें दस्सेआ जे एह इकाइयां आतंक-विरोधी अभियान दे कन्नो कन्नी कनून बवस्था बनाई रखने च बी योगदान देंगन। उधमपुर, कटुआ, रियासी, किशतवाड़, रामबन, राजौरी ते पुंछ च एह इकाइयां स्थापत कीतियां गेइयां न। इनें इकाइएं दा मुख ध्यान पीर पंचाल क्षेत्र ते चेनाव घाटी पर होग।

<><><><><><><>

IMA Strike

भारतीय मैडिकल एसोसिएशन आईएमए नै पच्छिम बंगाल दे सरकारी मैडिकल कालेज आर.जी.कर मैडिकल कालेज ते अस्पताल कोलकाता च इक महिला डाक्टर कन्नै बलात्कार ते उंदी हत्या दे खलाफ अज्ज 24 घंटे दी राष्ट्रव्यापी हड़ताल करने दा आह्वान कीता ऐ। आईएमए नै अज्ज बडलै 6 बजे थमां ओपीडी ते दूर्ई आम सेवां बंद करने दी अपील कीती ऐ। संगठन नै पीड़ित महिला डाक्टर आस्तै इंसाफ ते स्वास्थ्य कर्मिं दी सुरक्षा आस्तै केन्द्री कनून दी मंग कीती ऐ। इस आह्वान दे मगरा मुख्य भरै दे होर सेहत सरबंधी संगठन अपना विरोध करा करदे न।

<><><><><><><>

Amarnath Yatra

भगवान शिव ते माता पार्वती दी प्रतीक छड़ी मुआरक महंत दिपेन्द्र गिरी जी हुंदी अगुवाई च अज्ज शेषनाग थमां अगगे दी यात्रा आस्तै श्री अमरनाथ गुफा बक्खी बधी। कल संजा छड़ी यात्रा पहलगाम दी चंदनवाड़ी थाहर पुजजी ही। शेषनाग पवित्र झील पर बी पूजा अर्चना कीती गई। रातीं ठैहरने मगरा छड़ी मुबारक 18 अगस्त गी पंचतरनी आस्तै निकलग ते पंचतरनी आस्तै जेह्ड़े गै छड़ी दा खीरी पड़ांह ऐ रात गुजारने दे परैंत छड़ी मुबारक सौन म्हीने दी पुन्या गी श्री अमरनाथ गुफा च पूजा अर्चना करोगं इस दिन रखड़ी दा ध्यार बी होंदा ऐ। इस ब'रे श्री अमरनाथ जी दी सलाना यात्रा 29 जून गी शुरू होई ही ते तकरीबन 5 लक्ख 25 जहार श्रद्धालुएं भगवान भोलेनाथ दे दर्शन कीते।

<><><><><><><>

Chari Mubarak

मंत्रं दे जाप कन्नै श्री दशनामी अखाड़ा पुंद च अज्ज बडलै 6 बजे शा 8 बजे तोड़ी छड़ी पूजन कीता गेआ। एहूदे मगरा छड़ी मुबारक यात्रा दी तैआरियां कीती गेइयां। सलाना छड़ी मुबारक यात्रा बडलै साढे 9 बजे बुड्डा अमरनाथ जी दे मंदर राजपुरा आस्तै रवाना होग। कड़ी सुरक्षा प्रबंधे बकश ज्हारे दी गिनतरी च श्रद्धालुएं ते बसनीके छड़ी पूजन च हिस्सा लैता। छड़ी यात्रा गी दिखदे होई ट्रैफिक पुलस नै आम ट्रैफिक आस्तै दुए रस्ते बी खोले दे न।

<><><><><><>

Skill Ramban

कौशल विकास विभाग रामबन दे बेरोजगार नोजवाने गी स्वरोजगार ते उद्यमता च रुचि पैदा करने आस्तै प्रोत्साहित करा'रदा ऐ तां जे ओ अपने आस्तै आपै रोजगार पैदा करन। प्रधानमंत्री विश्वकर्मा योजना हेठ 16 रिवायती कोर्स शुरू कीते गे न जिंदे च मिट्टी दे भांडे बनाना, गुड्डियां ते खडोने बनाना, नाई, पत्थर पर नक्काशी करना, सखाना शामिल ऐ। इसलै दाखला दा पैहला गेड़ पूरा होई चुके दा ऐ। दूआ गेड़ 19 अगस्त थमां शुरू होग। एहू दाखला प्रक्रिया 60 बक्ख-बक्ख विषय आस्तै जारी ऐ। बुनियादी सिखलाई दा कार्यक्रम 5 ते 7 दिनें दा ऐ ते अगगे दी सिखलाई 15 जां मते दिन तगर दित्ती जंदी ऐ ते हर इक सिखने आले गी 5 सौ रपे सिखलाई भत्ते दे तौर पर दित्ते जंदे न। सुपरीटेंडेंट असिस्टेंट टैक्नीशियन रामबन परवेज इकबाल होरे दस्सेआ

<><><><><><>

Para Olympics

अजे तोड़ी दा सब्बने शा बड्डा 84 खडारिएं दा दल इस ब'रे होने आले पैरा ओलंपिक्स खेड्डे च हिस्सा लैग। पैरा ओलंपिक्स खेड्डां इस म्हीने दे 28 तरीक थमां 8 सितम्बर 2024 तोड़ी चलगंन। 47 खडारी इनें खेड्डे च पैहली बारी हिस्सा लै'रदे न। पैरिस पैरा ओलंपिक्स आस्तै जा'रदे भारती खडारिएं दे दल गील संबोधत करदे होई केन्द्री खेड्ड मंत्री मनसुख मांडविया होरे आखेआ जे इस दल च 50 खडारी ऐसे न जिनेंगी टारगेट ओलंपिक्स पोडियम स्कीम थमां लाहू थहोआ ऐ। इस स्कीम हेठ सरकार नै खडारिएं गी हर इक सहूलियत जियां प्रशिक्षण, कोचिंग दित्तियां न। मांडविया होरे आखेआ जे खेलो इंडिया खेड्डे चा बी केई खडारी उभरिये आए न। पिछली बारी दी टोक्यो च होई दी पैरा ओलंपिक्स खेड्डे च भारती खडारिएं उम्दा प्रदर्शन कीता हा ते 19 तगमे अपने नां कीते हे। इंदे च 54 भारती खडारिएं हिस्सा लैता हा।

<><><><><><>

Atal-Death Anniversary

देश अज्ज साबका प्रधानमंत्री ते भारत रत्न अटल बिहारी वाजपेयी हुंदा पुण्यतिथि उप्पर उनेंगी भाव भरोची श्रद्धांजलि अर्पित करा'रदा ऐ। अज्ज नमीं दिल्ली च अटल बिहारी वाजपेयी हुंदी समाधि सदैव अटल उप्पर इक प्रार्थना सभा दा बी आयोजन कीता गेदा ऐ। अटल बिहारी वाजपेयी त्रै बारी प्रधानमंत्री, दऊं बारी राज्यसभा मिनबर ते 10 बारी लोकसभा सदस्य रेह हे।

<><><><><><>

Udhampur Plantation

ग्रामीण विकास मैहकमा उधमपुर आस्सेआ जंगलात मैहकमे ते म्यूनिसिपल कौंसल उधमपुर दे सैहयोग कन्नै स्वच्छता पखवाड़ा अभियान दे हिस्से दे तौरा पर सूई सिंबल इलाके च मनरेगा तैहत बूहटे लाने आली मुहिम दा सरिस्ता कीता गेआ। इस मौके उधमपुर दियां डिप्टी कमीशर सलोनी राय होरें पर्यावरण संरक्षण दी महत्ता पर जोर पाया। उनें गलाया जे नेही मुहिम कन्नै खित्ते च लगातार ते टिकाऊ विकास ते पर्यावरण दी सांभ संभाल गी होर बढ़ावा थहोग। एहदा मकसद पर्यावरण दी हिफाजत आस्तै इक ग्रीन कवर तैआर करना ते इलाके च पर्यावरण स्हाबै संतूलन कायम करना ऐ।

<><><><><><>

Amrit Udyan-Opening

अमृत उद्यान अज्जै थमां आम लोकें लेई खोली दितता जाग, जेहड़ा अगले म्हीने दी 15 तरीक तगर खुल्ला रौहग। राष्ट्रपति द्रौपदी मुर्मू होरें राष्ट्रपति भवन च बुधवारें गी अमृत उद्यान गर्मिएं आले संस्करण 2024 दा उद्घाटन कीतां इस ब'रे पैहली बारी 29 अगस्त गी राष्ट्री खेड्ड दिवस दे मौके पर खडारिएं गी अमृत उद्यान दी सैर करने दा साददा दित्ता गेआ ऐ। एहदे अलावा स्कूलें ते यूनिवर्सिटिएं दे शिक्षकें गी बी फुल्लें गी दिक्खने लेई सददेआ गेआ ऐ। इस बारी लोकें गी बाग च बोनसाई गार्डन, रोज गार्डन ते सेंद्रल लान च टकोहदे किस्में दे फुल्ल दिक्खन गी लबगंन ते बच्चें लेई ट्री हाउस, बाल वाटिका ते शिक्षण कक्ष जनेह नेकां बवस्था आकर्षन दा केन्द्र होंगन।

<><><><><><>